

Per la terza giada – il pievel na vul savair nagut d'ina cassa unica

Reacziuns d'adherents ed adversaris

■ **(anr/vi) Il suveran para d'esser cuntent cun il sistem da sanadad e refusa l'iniziativa per ina cassa publica. Jacqueline Fehr avertescha ils adversaris da tegnair pled, uschiglio fetschian ins puspè in'iniziativa.**

La cussegliera naziunala da la ps pretenda che las cassas da malsauns smettian ussa cun lur chatscha sin assicurads sauns. Ch'il parlament haja meglierà ils 2013 la gulivaziun da ristgs saja bain in «pass impurtant», ma na bastia anc betg per eliminar ils sbagls dal sistem dad oz.

Tant la gulivaziun sco era la surveglianza da las cassas ch'il parlament haja decidì avant paucs dis sajan «meglieraziuns realas» ch'ins haja fatg pussaivel sulet entras il squitsch da l'iniziativa per ina cassa unica.

Cumpareglià cun la votaziun dal 2007 hajan las vuschs per ina cassa unica dentant prendì tiers. Las cassas hajan pers la fidanza da la populaziun, ha ditg Fehr. Per las assicuranzas saja questa votaziun perquai tut auter ch'in success.

Uss èsi da s'occupar dals custs

Ina cassa unica na saja naging tema pli suenter il cler «na» da questa fin d'emna,

di cusseglier dals chantuns *Felix Gutzwiller* (pld). «Ins dastga ir da quell'anora che la cassa publica è uss liquidada suenter il terz na dal pievel.»

En l'avegnir stoppian ins empruvar da tegnair a mastrin ils custs creschents da sanadad. Da sminuir las prestaziuns na vegnia betg en dumonda, perquai stoppian ins segirar sistematicamain la qualitad, ha ditg Gutzwiller. I na saja betg cler sch'in center da sanadad naziunal, sco quai ch'il cussegl federal propona, portia la soluziun. La direzziun saja dentant la gista.

Per *Verena Nold*, directura da Santé-suisse, è il na tar ina cassa publica in segn ch'il pievel è cuntent cun las assicuranzas da malsauns. Er ella fa attent ch'ins stoppia ussa s'occupar dals custs. Lezs creschian pervi dal progress tecnologic.

Impurtant saja da lubir mo quels tractaments e medicaments che sajan economics, cunvegents e che fetschian propi effect. Ins stoppia sviluppar indicaturs per la qualitad da las prestaziuns ed era far da savair quels a la populaziun, ha ditg Nold. «Tar medis che pratitgeschian a moda independenta na sajan las controllas anc betg suffizientas.

